

Jonas

MISIONARIU LOOS??



Na'i lia tun nune'e ba
profeta Jonas:
“Hamriik hodi la'o
ba cidade boot
Ninive nian,
atu haklaken ba ema
sira ne'ebá, tanba
sira-nia hahalok aat
nia naran boot to'o ona
mai Ha'u Futar oin”.



Maibé Jonas hakarak
halai ba Tarsis,
hodi hadook an husi Na'i
Nia Futar oin.
Nia tun ba Jope,
iha ne'ebá hetan tiha ró ida

Na'i halo anin huu
maka'as, laloran boot,
halo ró atu mout sala-
sala. Ema sira be
servisu iha ró laran
ta'uk teb-tebes,
maibé, Jonas tun tiha
bar ó kidun, nia toba
dukur loos iha ne'ebá.



Ema sira be iha ró laran dehan ba malu: It aba dada sorti atu hatene loos, susar ne'e mai ita tan sê loos. Sira dada sorti, sorti ne'e monu iha Jonas nia leten... ema sira ta'uk teb-tebes, sira husu ba nia: "Ami sei halo sa loos ba ó atu tasi bele sai maus fali mai ita?" Tan tasi sai fuik liután. Jonas hateten: "Imi kaer iha ha'u, hodi so'e ha'u ba tasi, atu tasi bele sai maus fali"... sira harohan ba Na'i, hodi dehan: "Na'i, keta husik ami mate tan ema ida ne'e nia moris, maibé, keta halo ami hetan lia tan ema sala laek ne'e nia mate, basá, Na'i, Ita mak hakarak halo nu'udar buat di'ak, tuir Ita-nia hakarak".



Sira kaer Jonas hodi sóe nia ba tasi laran, tasi be siak liu, sai maus tiha kedas. Haree tiha ne'e, ema sira ne'e hamta'uk Maromak...



Nune'e, Na'i haruka ikan boot ida tolan tiha Jonas; Jonas hela iha ikan ne'e nia kabu-laran, loron tolu kalan tolu.

Hafoin, Na'i fó
ordem ba ikan hodi
muta sai Jonas
iha tasi ninin,
iha rai maran.





Na'i lia tun ba Jonas
ho liafuan hirak ne'e:
“Hamriik hodi
la'o ba cidade boot
Ninive nian,
hodi haklaken ba nia,
lia Ha'u dehan ba ó”.

Jonas hamriik
la'o ba Ninive,
tuir Na'i Futar
Liafuan...

Ninive cidade
boot ida,
hodi loron tolu
atu la'o husi
rohan ba rohan

. Jonas tama
iha cidade, nia hahú hanorin ho liafuan hirak ne'e:
“Loron 40 tan, Ninive sei rahun”.



Ema sira tur iha cidade Ninive nian, fiar Maromak, sira fó sai jejum ida, ema hotu... hatais hena tartarak. Liurai ho nia ministru sira fó sai orden ida ne'ebé dehan: “Ema no balada sira hotu, la bele han koko ai-han, la bele han duut, la bele hemu bee. Ema no balada sira hotu sei taka an ho hena tartarak. Hotu-hotu sei harohan ba Maromak ho laran tomak no kbiit hotu; ida-idak sei hadook an husi hahalok aat no husi sala todan ne'ebé iha sira-nia liman. Se mak hatene? Maromak hanoin fila hodi hasai Nia kastigu husi ita, hatun Nia hirus, atu ita la bele mate mohu”.





Maromak haree tiha
sira-nia hahalok,
hanesan atu husik
tiha sira-nia hahalok
aat, Nia hasai tiha
kastigu ne'ebé atu
haterus sira. Jonas
laran moras tebes
hodi hirus tan Na'i
perdua ema sira
Ninive nian.

Ho laran nakali, hodi harohan ba Na'i nune'e: "Na'i, la'ós ida ne'e mak ha'u hateten, bainhira ha'u sei horik iha ha'u rain? Ha'u hatene nanis ona katak Ita mak Maromak laran luak tebes, pronto atu perdua, la hirus lalais, laran di'ak teb-tebes, la hano in atu fó kastigu; tan ne'e mak ha'u halai tiha ba Tarsis. Maibé, oras ne'e, Na'i bele hasai ona ha'u-nia moris: ba ha'u, mate, di'ak liu fali moris".



Maibé Na'i hatán ba nia:
“Ó-nia hanoín loos tebes,
atu halo ó hirus nune'e?”

Jonas sai tiha husi Ninive
hodi ba tur iha cidade ne'e
nia sorin husi Loro-sa'e. Iha
ne'e nia halo taka baluk ida
hodi tur iha nia mahan atu
haree sa loos mak sei mosu
ba cidade ne'e.





Na'i Maromak halo
moris ai-horis ida,
aas liu Jonas, atu
hamahan netik nia ulun,
hodi haksolok netik
nia laran susar.
Jonas haksolok tebes
ho ai-horis ne'e.

Maibé, iha loron tuir mai, wainhira loro-matan mosu, Maromak haruka ular ki'ik oan ida tata kotu hotu ai-horis ne'e nia abut, ai-horis ne'e maran tiha...

Maromak halo anin manas huu husi loro-sa'e mai. Loro baku loos mai iha Jonas nia ulun leten. Jonas sai oin nakukun tiha, hakarak atu mate, dehan: “Ba ha'u, mate, di'ak liu fali moris”.





Nune'e Maromak nia lia tun ba
Jonas, nune'e: "Ó-nia hanoin
katak ó-nia hanoin loos tebes,
atu hirus tan ai-horis ne'e?".
Jonas hatán: "Loos duni, ha'u-
nia hanoin loos tebes atu hirus
to'o mate".

Na'i lia tun netik ba nia:
"Ó hanoin netik loos ai-horis
ne'e, ne'ebé ó la kole kuda nia,
hodi halo nia sai boot, ne'ebé
moris iha kalan ida nia laran,
iha fali kalan seluk nia mate".



Oinsá,
Ha'u la bele hanoin netik
sidade boot Ninive nian,
ne'ebé iha ema rihun 120,
ne'ebé la hatene haree
loos sira-nia liman loos
husi liman karuk,
nune'e mós ho balada
wa'in tebes?»



Jonas: misionariu loos?